

आकाशवाणी

1. प्रधानमंत्री नरेंद्र मोदी होरें नमीं दिल्ली च राइजिंग नार्थ ईस्ट निवेशक सम्मेलन दा उद्घाटन करदे होई आखेआ जे उंदी सरकार नै आतंकवाद ते माओवादी तत्वे खलाफ बिंद बी बर्दाश्त नेई करने दी नीति बनाई दी ऐ।
2. केंद्री गृह मंत्री अमित शाह होरें आखेआ जे ऑप्रेसन सिंदूर दे दौरान दुनिया बीएसएफ ते थेआरबंद बलें दी दलेरी दी सराहना करा'रदी ऐ।
3. विदेश मंत्री डॉ. एस जयशंकर होरें आखेआ जे दुनिया घट्ट पच्छमी, मती विविधतापूर्ण ते वैश्विक ते तेजिया कन्नै एशियाई होआ करदी ऐ।
4. ईटली दे रोम च अमेरिका ते ईरान बश्कार परमाणु गल्लबात दा पंजमा दौर शुरू होई गेआ ऐ।
5. भारती मौसम विभाग नै कल्लै तगर कोंकण ते गोआ च मती भारी बरखा पौने दी पेशगोई कीती ऐ।
6. भारती निशानेबाज रायजा ढिल्लो नै जर्मनी च चला 'रदे आई.एस.एस.एफ जूनियर विश्वकप च महिलाएं दी स्कीट इवेंट च चांदी दा तगमा जितेआ ऐ।

<><><><><><>

PM-North-East

प्रधानमंत्री नरेंद्र मोदी होरें आखेआ ऐ जे भाएं आतंकवाद होऐ जां अशांति फलाने आहले माओवादी तत्व, उंदी सरकार नै बिंद बी बर्दाश्त नेई करने दी नीति अपनाई दी ऐ। अज्ज नमीं दिल्ली च राइजिंग नार्थ ईस्ट इन्वेस्टर्स सम्मेलन दा उद्घाटन करदे होई मोदी होरें आखेआ ऐ जे विकसित भारत बनाने आस्तै मुख्य दे पूर्वोत्तर खेतर दा विकास बड़ा जरूरी ऐ। उनें निवेशकें गी पूर्वोत्तर खेतरें च बक्ख-बक्ख खेतरें दा पता लाने दी ताकीत करदे होई आखेआ ऐ जे पूर्वोत्तर हून मते अवसरें दी थाहर बना करदा ऐ। उनें आखेआ जे पूर्वोत्तर उर्जा ते सेमीकंडक्टर जनेह खेतरें आस्तै मुख् केंद्र बना करदा ऐ। प्रधानमंत्री होरें आखेआ ऐ जे ईस्ट दा मतलब ऐ, सशक्त बनाना, कम्म करना, मजबूत बनाना ते बदलना। उनें आखेआ ऐ जे इक समां हा जिसले पूर्वोत्तर गी छड़ा सीमांत खेतर आखेआ जंदा हा, पर हून एह विकास दे खेतर च अभरियै सामने आवा करदा ऐ।

इस मौके पर बोलते होई पूर्वोत्तर खेतर दे विकास मंत्री ज्योतिरादित्य सिंधिया होरें आखेआ ऐ जे केद्र सरकार नै पूर्वोत्तर खेतरें च बुनियादी ढांचे ते राबते गी बढ़ावा देने दी दिशा च मता कम्म कीता ऐ। दऊं दिनें दे इस सम्मेलन दा मकसद पूर्वोत्तर क्षेत्र गी मते अवसरें दी भूमि दे तौरा पर उजागर करना ते उत्थे वैश्विक ते घरेलू निवेश गी बढ़ावा देना ऐ। इस शिखर सम्मेलन दा मुख मकसद इब्बी ऐ जे हितधारकें, निवेशकें ते नीति निर्माताएं गी इक्क गै मंच उप्पर कट्ठा करना।

<><><><><><>

Shah BSF

केन्द्री गृह मंत्री अमित शाह होरें आखेआ ऐ जे आपरेशन सिंदूर, पहलगाम च होए दे आतंकवाद हमले दा जोआब हा ते अज्ज पूरी दुनिया, भारत दे थेआरबंद बलें दी दलेरी दी सराहना करै करदी ऐ। अज्ज नमीं दिल्ली च सीमा सुरक्षा बल दे अलंकरण समारोह गी संबोधित करदे होई श्री शाह होरें आखेआ जे बीएसएफ ते होरनें थेआरबंद बलें पाकिस्तान दे खलाफ कीती गेदी कार्रवाई दरान जबरदस्त दलेरी ते ताकत दा परिचय दिता ऐ। उनें आखेआ जे पाकिस्तान नै जिसलै भारत आसेआ आतंकवादिणं पर कीते गेदे हमले गी अपने उप्पर हमला करार दिता तां इक चाल्ली कन्नै उन्नै एह गल्ल स्वीकार करी लैती जे आतंकवादी तंत्र, पाकिस्तान दा गै इक अहम हिस्सा ऐ।

<><><><><><>

Jha-Delegation

जनता दल यूनाइटेड दे सांसद संजय झा हुंदी अगुवाई च जपान गेदे सर्वदलीय प्रतिनिधिमंडल नै अज्ज जपान दे टोक्यो च लिबरल डेमोक्रेटिक पार्टी दे आतंकवाद रोधी शोध समिति दे अध्यक्ष ते साबका न्यास मंत्री यासूहिरो हनाशी हुंदे नै मलाटी कीती। प्रतिनिधिमंडल नै आतंकवाद दे खलाफ भारत दे हर चाल्ली दी इजुटता ते सख्त रूख पर लोस पाई। दौनें पक्खें आतंकवाद दे खलाफ बिंद बी बर्दाश्त नेई करने दे नजरियै गी दोहराया। इस गल्लबात दौरान झा होरें आखेआ जे दुनिया दी हर आतंकवादी गतिविधि दा सरबंध पाकिस्तान दे कन्नै रेआ ऐ। एह कोई नमीं गल्ल नेई ऐ। एहदे थमां पैहले डी.एम.के सांसद कनिकोई करुणानिधि दी अगुवाई च गेदा इक होर सर्वदलीय प्रतिनिधिमंडल अज्ज मास्को पुज्जा। रूस च भारत दे राजदूत विनय कुमार नै प्रतिनिधिमंडल दी आधिकारिक गतिविधियां शुरू होने थमां पैहले उनें भारत-रूस सरबंधें दे बक्ख-बक्ख पैहलुएं बारै जानकारी दिती।

नेईबल्के छड़ा इक आतंकी हमला हा। उनें आखेआ जे जलवायु परिवर्तन ते बदधी गरीबी दे कन्नै-कन्नै आतंकवाद सब्बनें थमां बड्डी चुनौती ऐ। विदेश मंत्री होरें इब्बी आखेआ जे पाकिस्तान कश्मीर च भारत दे बन्नै दा उल्लंघन करदा आवा करदा ऐ।

<><><><><><><><>

America-Iran Talks

अमरीका ते ईरान बश्कार परमाणु वार्ता दा पंजमां दौर इटली दे रोम च शुरू होई गेआ ऐ। इस वाता दा मकसद ईरान दे परमाणु कार्जक्रम गी सीमित करना ऐ। एहदे बदले च अमरीका नै ईरान पर लग्गे दे किश आर्थिक प्रतिबंध हटाई लैते न। एह बैठक ओमान दे मस्कट च पिछले दौर च तेहरान दे यूरेनियम संवर्धन कार्यक्रम पर सार्वजनिक असहमति दे बाद होआ रदी ऐ। वार्ता च अमरीका दा प्रतिनिधित्व अमरीका दे मध्य पूर्व दूत स्टीव विटकॉफ ते विदेश मंत्रालय दे नीति नियोजन निदेशक माइकल एंटोन करा रदे न। ओमान दे विदेश मंत्री बद्र अल बुसैदी वार्ता दी मध्यस्थता करा 'रदे न। इस बरे अप्रैल च शुरू होई दी एह वाता 2018 च अमरीका दे राष्ट्रपति डोनाल्ड ट्रम्प हुंदे पैहले कार्जकाल दौरान अमरीका आसेआ 2015 दे परमाणु समझौते थमां हटने दे बाद दोनै देशें बश्कार उच्च सतह दी गल्लबात ऐ। अप्रैल थमां हुनै तोड़ी चार दौर दी वार्ता होई चुकी दी ऐ जेदे च त्रै मस्कट च ते इक्क रोम च होई ऐ। तोआई, वार्ता थमां पैहले ईरान दे विदेश मंत्री सईद अब्बास अराघची हारें आखेआ जे अमरीका ईरान दे यूरेनियम संवर्धन गी खत्म करने दी मंग जारी रखदा ऐ तां कोई परमाणु समझौता नेई होग। राष्ट्रपति ट्रम्प नै 20 जनवरी गी राष्ट्रपति कार्यालय च आने दे बाद ईरान पर अपना बड़ा मता दबाs बनाना परतियै शुरू करी दिता ऐ। उनें चला रदी वार्ता दा समर्थन कीता ऐ पर कन्नै गै एह चेतावनी दिती ऐ जे कूटनीति प्रयास सफल नेई होऐ ते सैन्य कार्रवाई बी इक्क विकल्प ऐ।

<><><><><><><><>

PM-MKB

प्रधानमंत्री नरेन्द्र मोदी होर औंदे ऐतवारें 25 मई गी आकाशवाणी पर प्रसारित होने आहले अपने महावार रेडियो कार्यक्रम "मन की बात" राए देश विदेश च रोहने आहले लोकें कन्नै अपने विचार सांझे करडन। हर म्हीने दे अखीरले ऐतवार प्रसारित होने आहले इस कार्जक्रम दी एह 122मीं कड़ी होग। एह कार्जक्रम 25 मई गी बड्डलै 11 बजे आकाशवाणी ते दूरदर्शन दे समूलचे नेटवर्क पर प्रसारित कीता जाग। एहदे

कन्नोकन्नी प्रधानमंत्री हुंदे दफ्तर, सूचना ते प्रसारण मंत्रालय ते आकाशवाणी समाचार ते डी.डी न्यूज दे यू-ट्यूब चैनलें पर बी मन की बात कार्यक्रम उपलब्ध होग। मन की बात दे हिंदी प्रसारण दे तुरत मगरा एहदा डोगरी भाषा च अनुवाद प्रसारित कीता जाग। एहदे अलावा तुस एहदा डोगरी अनुवाद इक बारी फी रातीं 8 बजे आकाशवाणी जम्मू पर सुनी सकदे हो।

<><><><><><>

Announcement-Prog

आकाशवाणी जम्मू दे क्षेत्रीय समाचार एकांश ऑप्रेशन सिंदूर बारै 20 मिनंटे दी इक विशेष परिचर्चा प्रसारित करोग। इस कार्जक्रम च जम्मू कश्मीर सैनिक कल्याण मैहकमे दे निदेशक ब्रिगेडियर रटैर गुरमीत सिंह शान होरें अपने विचार सांझा करडन। एह विशेष कार्यक्रम 24 मई गी बड्डलै साड्डे 9 बजे प्रसारित कीता जाग ते उन्दे नै गल्ल करडन स्हाढे न्यूज एंकर विजय बजा। एह कार्जक्रम Medium wave 990 KH0/ 104.5 MH3 ते FM 100.3 पर सुनेआ जाई सकदा ऐ। तुस इस बारै अपनी प्रतिक्रिया ते सुझा rnujammu@gmail.com पर सांझा करी सकदे हो।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां गैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Weather

मौसम विभाग नै दक्खन कोंकण, कर्नाटक ते तटीय खेतरें, मध्य महाराष्ट्र ते गोआ च तेज बरखा दा रेड ते ओरेंज अलर्ट जारी कीता ऐ। आकाशवाणी समाचार कन्नै गल्ल करदे होई विभाग दे वैज्ञानिक आर.के जेनामणि होरें आखेआ जे सारी परिस्थितियां पच्छमी राजस्थान च दो दिनें तोड़ी तेज गर्मी दी संभावना ऐ। उत्थे धूड़ भरोची दी अंधी झुल्लने दी बी मेद ऐ। तोआई अज्ज दिल्ली राष्ट्रीय राजधानी खेतर च अंधी, तेज बहामां ते बिजली कड़कने दे कन्नै हल्की बरखा नै लोकें गी कड़ाके दी गर्मी थमां बिंद राहत दी मेद ऐ।

<><><><><><>

ISSF-JR Shooting

निशानेबाजी च ओलंपियन रायजा ढिल्लो नै जर्मनी च चला 'रदे आई.एस.एस.एफ जूनियर विश्व कप च महिलाएं दी स्कीट इवेंट च चांदी दा तगमा हासिल कीता ऐ। ढिल्लो नै 60 शॉट दे फाइनल च 51 नशाने लाए। ओह ग्रेट ब्रिटेन दी फोबे बोडले स्कॉट थमां पिच्छे रेही जिन्ने 53 दे स्कोर कन्नै सुन्ने दा तगमा जितेआ। जर्मनी दी एनाबेला हेटमर नै कैंस दा तगमा हासल कीता। भारत विश्व कप च इक सुन्ने दा ते दो चांदी दे तगमें कन्नै तगमें दी गिनतरी च पैहले नम्बरा पर ऐ।

<><><><><><>

Jaishankar-Barlin

विदेश मंत्री डॉ. एस जयशंकर होरें अज्ज बर्लिन दे जर्मन चांसलर फ्रेडरिक मर्ज हुंदे कन्नै मुलाकात कीती। उनें प्रधानमंत्री नरेंद्र मोदी हुंदे आसेआ शुभमामनां दितियां ते आतंकवाद दी चुनौती दा मुकाबला करने च भारत दी इकजुटता दी सराहना कीती। उनें आखेआ जे ओह भारत-जर्मनी कार्यनीतिक सांझेदारी गी बदाने आस्तै श्री मर्ज हुंदी सरकार दे कन्नै कम्म करने लेई उत्सुक न। डॉ. जयशंकर होरें अज्ज जर्मन चांसलर दे विदेश ते सुरक्षा नीति सलाहकार डॉ. गुंटर साउटर कन्नै बी गल्लबात कीती। उनें आतंकवाद कन्नै निब्बडने समेत प्रमुख वैश्विक मुद्दें पर अपने विचार सांझा कीते। सोशल मीडिया पोस्ट च डॉ. जयशंकर होरें आखेआ जे भारत ते जर्मनी बश्कार बददी सांझेदारी दुनिया च स्थिरता दा इक्क महत्वपूर्ण पहलू ऐ। विदेश मंत्री होरें अर्थ बवस्था ते उर्जा मंत्री कैथरीना रीचे हुंदे'नै बी मलाटी कीती ते भारत-जर्मनी प्रतिभा, संपर्क, उद्योग सांझेदारी ते संयुक्त सहयोग गी बदाने दे तरीके पर चर्चा कीती।

HM-BSF

केंद्री गृह मंत्री अमित शाह होंरें आखेआ ऐ जे आपरेशन सिंदूर पहलगाम हमले दा जवाब ऐ ते अज्ज दुनिया भारती सशस्त्र बलें दी बहादुरी दी सराहना करा 'रदी ऐ। शाह होंरें आखेआ ऐ जे सरकार दी मजबूत राजनीतिक इच्छा शक्तियें ते खूफिया एजेंसियें दी सच्ची जानकारी ते सशस्त्र बलें आसेआ कीती गेदी कार्रवाई दे कारण गै एह संभव होई सकेआ ऐ। अज्ज नर्मी दिल्ली च सीमा सुरक्षा बल यानि बीएसएफ अलंकरण समारोह गी संबोधित करदे होई अमित शाह होंरें बीएसएफ ते सशस्त्र बलें पाकिस्तान खलाफ भारत दी जवाबी कार्रवाई च मती वीरता ते रक्षा दी सच्ची शक्ति दा प्रदर्शन कीता ऐ।

<><><><><><>